

qui mourut vn Jour apres son baptesme. auant que de quitter les outagamis le s^t. Esprit me fit apporter a nostre chapelle deux enfans qui estoient fort malades que ie baptisay, ils moururent peu de temps apres mon despart. après que J'eus acheué la mission des outagamis, J'appris que le Capitaine miami qui auoit esté mon hoste estoit a l'extremité ie luy auois diféré Jusq⁹ a lors le baptesme, parce que quoy qu'il y parut assés disposé il ne pouuoit en qualité de Capitaine s'empêcher de s'engager par bien seance aux superstitions des Jeunes gens. J'allay ches luy mais il n'y estoit pas, et lors qu'il y venoit po⁹ me trouuer et estre baptisé il mourut en chemin sans baptesme; Dieu me refusa celuy la po⁹ lequel J'aurois faict le voyage, mais ma peine ne fut pas inutile, Car en la place de ce Capitaine Il m'acorda deux autres personnes que ie baptisay auant leur mort.

Le P. Jacques Marquette a commencé une quatrième Mission, qui est celle des Illinois. Ce sont les premiers peuples qu'il a rencontrés dans le voyage qu'il fit l'an passé, pour la découverte de la mer du Sud. Ce Père est allé, le printemps dernier, jeter les fondemens de cette Mission; c'est à son retour qu'il a glorieusement fini sa vie au milieu de ses travaux, sur les bords mêmes du lac des Illinois. Nous donnons ici le narré de sa mort et des circonstances remarquables qui l'ont accompagnée.